



# basic education

Department:  
Basic Education  
REPUBLIC OF SOUTH AFRICA

## NATIONAL SENIOR CERTIFICATE

LIBANGA 12

SISWATI LULWIMI LWEKUCALA LWEKWENGETA (FAL)

LIPHEPHA LESIBILI (P2)

INDLOVANA/INDLOVULENKHULU 2015

EMAMAKI: 70

SIKHATSI: 2 ema-awa

Leliphepha linemakhasi la-17.

**TICONDZISO**

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbuto lobutwe ngetincwadzi lotifundze kulomnyaka. Emva kwaloko, fundza leyo mibuto lenetimphawu kuphela bese ukhetsa leyo lofuna kuphendvula yona.
3. Leliphepha lemibuto licuketse TIGABA LETINE

SIGABA A:	Inoveli	(35)
SIGABA B:	Umdlalo	(35)
SIGABA C:	Tindzaba letimfisha	(35)
SIGABA D:	Tinkondlo	(35)
4. Phendvula imibuto LEMIBILI kuphela. MUNYE umbuto kusinye setigaba letimbili.  
  
SIGABA A: INOVELI  
Phendvula MUNYE umbuto wenoveli.  
  
SIGABA B: UMDLALO  
Phendvula MUNYE umbuto wemdlalo.  
  
SIGABA C: TINDZABA LETIMFISHA  
Phendvula YOMIBILI imibuto lebutwe ngetindzaba letimfisha.  
  
SIGABA D: TINKONDLO  
Phendvula TOTIMBILI tinkondlo lekubutwe ngato.
5. Sebentisa luhlu lwekutikhumbuta kute usitakale.
6. Landzela ticondziso letisekucaleni kwaleso NALESO sigaba.
7. Tinombolo tetimphendvulo atihambisane naleto temibuto njengobe tinjalo ephepheni lemibuto.
8. Cala LESO NALESO sigaba ekhasini LELISHA.
9. Siphakamiso sekulawulwa kwesikhatsi singaba ngemaminithi la-60 kuleyo naleyo nchwadzi.
10. Bhala ngesandla lesibonakalako nalesifundzekako.

**LUHLA LWEKUTIKHUMBUTA**

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe liphepha lemibuto.

<b>SIGABA A: INOVELI</b>			
Phendvula umbuto wenoveli.			
<b>INOMBOLO YEMBUTO</b>	<b>UMBUTO</b>	<b>EMAMAKI</b>	<b>LIKHASI</b>
1. Kwasha Tikhotsa	Imibuto lemifisha	35	5–7
<b>SIGABA B: UMDLALO</b>			
Phendvula umbuto wemdlalo.			
2. Lahloma Ladvuma	Imibuto lemifisha	35	8–10
<b>SIGABA C: TINDZABA LETIMFISHA</b>			
Phendvula YOMIBILI imibuto lebutwe ngetindzaba letimfisha.			
3.1 Litsambo	Imibuto lemifisha	18	11–12
3.2 Litsambo	Imibuto lemifisha	17	13–14
<b>SIGABA D: TINKONDLO</b>			
Phendvula TOTIMBILI tinkondlo lokubutwe ngato.			
4.1 Letfwese	Imibuto lemifisha	18	15–16
4.2 Letfwese	Imibuto lemifisha	17	16–17

**LUHLA LWEKUTIKHUMBUTA**

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe liphepha lemibuto.

<b>SIGABA</b>	<b>TINOMBOLO TEMIBUTO</b>	<b>LINANI LEMIBUTO LEPHENDVULWAKO</b>	<b>THIKA</b>
<b>A: Inoveli</b> (Imibuto lemifisha)	1	1	
<b>NOBE</b>			
<b>B: Umdlalo</b> (Imibuto lemifisha)	2	1	
<b>NOBE</b>			
<b>C: Tindzaba letimfisha</b> (Imibuto lemifisha)	3	2	
<b>NOBE</b>			
<b>D: Tinkondlo</b> (Imibuto lemifisha)	4	2	

CAPHELA: Cikelela kutsi uphendvule imibuto lesetigabeni LETIMBILI kuphela.

**SIGABA A: INOVELI**

Phendvula umbuto wenoveli.

**UMBUTO 1: KWASHA TIKHOTSA – LL Dlamini**

Fundza lethekesthi bese uphendvula imibuto letawulandzela.

'Alisekho litsemba lekutsatsa bukhosi beMaswati ngobe tisekelo lebenginato Mswati utibhidlitile taphela,' kuphendvula Somcuba.

'Utsi kwentiwe njani nyalo kuze ematsemba abuye mnaketfu?'

'Yonkhe imitamo yetfu ayimange ibe yimphumelelo, ngako-ke kumele sikhale phasi sihlele emasu lamasha lasatawusiphumelelisa.'

'Inkhulumo yebantwana boSomcuba naNdlela kanye naFokotsi beyiba nesihloko sinye, 'Mswati' ngaso sonkhe sikhatsi.

'Ngabe Mswati usicabangelani lena eLudzidzini?' Kubuta Ndlela.

'Akukho lasicabangela kona ngobe sabekwa nguye kulenzawo lesihleti kuyo. Kube abecondze kusihlasela ngabe kadze akwenta loko, kepha ubahlasela ngala nangala asishiye tsine.'

'Angeke umetsembe Mswati, ngobe ulala agucuka.

Angiyetsembi leya ndvodza, sambane lesimba umgodzi singawulali lesa!' Kusho Ndlela akhombisa kusola lokukhulu.

'Khululeka Ndlela! Akukho lesingakwentiwa nguMswati siyingati yinye,' kusho Somcuba acinisa Ndlela lidvolo. Ndlela abenekusola lokukhulu akhombisa kungametsembi Mswati kantsi Somcuba abenesibindzi angaboni bungoti kuMswati.

Batsite basakhuluma bantwana, kwafika Sidwala ahamba ashakutela watsi, 'Sekuphele emalanga lamabili ngingalali bantfwabenkhozi.'

'Kwentenjani Sidwala? Ulala udleni onkhe malanga loku lokukwenta ungalali?' Kubuta Somcuba.

'Kufika babe ngeliphupho utsi asitfutseni kulenzawo ngobe lukhulu luyeta luyenyelela.'

'Sitfutse sishiye indzawo lenhle kangaka siye kulesingayati?' Kubuta Somcuba akhombisa kusola lokukhulu.

'Lami liphupho alishayi phasi. Nginelidloti lelinemandla lelingitjela konkhe lokutawukwenteka.'

[Likhasi 73–75]

1.1 Bobani letisekelo lekukhulunywa ngato kulethekesthi lengenhla?  
Khetsa YINYE imphendvulo kuleti.

- A Sidwala, Gwalagwala, Tikhuba naSicobolonjwane.
- B File, Somcuba, Mngayi naFokotsi.
- C Ndlela, Sandlane, Khambi naMbovane.
- D Ngwavuma, Mzila, Mhlangala naMtjekeni.

(1)

- 1.2 Shano kutsi lendzaba lekulenoveli yenteka kuphi. Khetsa YINYE imphendvulo kuleti.
- A KwaZulu-Natali  
B EMpumalanga  
C ELesotho  
D Eswatini (1)
- 1.3 Shano kutsi Mswati abebukene nayiphi inkinga endzabeni. Khetsa YINYE imphendvulo kuleti.
- A Kungevani naletinye tive.  
B Kuvukelwa banakabo.  
C Kungevani nemakhosikati akhe.  
D Kungevani netindvuna takhe. (1)
- 1.4 Kuchazani kuba nelidloti lelinemandla? Khetsa YINYE imphendvulo kuleti.
- A Kuba nelidimoni lelinemandla.  
B Kuba nesifo sekuwa.  
C Kuvukwa ngumoya wekuphrofetha.  
D Kuba nesiphiwo sekubona lokufihlekile. (1)
- 1.5 Shano kutsi lendzaba yenteka esikhatsini sanyalo nobe sakudzala. Sekela imphendvulo yakho. (2)
- 1.6 Condzanisa emagama lakuKHOLOMU A netimphendvulo letikuKHOLOMU B.

<b>IKHOLOMU A</b>	<b>IKHOLOMU B</b>
1.6.1 Imekemeke	A Nguyise waMswati losaphila.
1.6.2 Gwalagwala	B Inceku yenkhosi.
1.6.3 Malunge	C Imbongi yenkhosi.
1.6.4 Khambi	D NgumnakaboMswati.
1.6.5 Tikhuba	E Sigodlo senkhosi.
1.6.6 Somcuba	F Indvuna yenkhosi.

(6 x 1) (6)

- 1.7 Ngabe liphupho laSidwala laba ngemaciniso yini? Usho ngani? (2)
- 1.8 Ngubani umlingisi lomkhulu kulenoveli? Sekela imphendvulo yakho. (2)
- 1.9 Lutfolakala kuphi luvutfondzaba kulenoveli? (2)

- 1.10 Ligama lelitsi, 'Tsandzile, limfanele yini? Usho ngani? (2)
- 1.11 Sidwala uvetwe njengemlingisi lonjani ngekwesimilo? Bhala emaphuzu LAMATSATFU. (3)
- 1.12 Itsini igcikitsi yalenoveli? Sekela ngemaphuzu LAMABILI ubhekise endzabeni. (3)
- 1.13 Ngabe lenoveli iyimbangalusizi yini nobe senamisi? Sekela imphendvulo yakho ngemaphuzu LAMABILI. (3)
- 1.14 Bhala kube KUTSATFU lokukhombisa kutsi letenteko letisendzabeni tiyakholweka. (3)
- 1.15 Sifundvo sini lesitfolakala kulenoveli? Bhala emaphuzu abe MATSATFU. (3)
- [35]**

**SAMBA SESIGABA A: 35**

**SIGABA B: UMDLALO**

Phendvula umbuto wemdlalo.

**UMBUTO 2: LAHLOMA LADVUMA – Z Motsa**

Fundza letheksthi bese uphendvula imibuto letawulandzela.

NDVUKUTEMPHI: Ufike nini wena lapha? (Ubeka phansi tikhali takhe, ubuyela esihlalweni.)

MADZANDZA: (Etama kwehlisa kuphakama kwemaphaphu.) Ngiyangena nje Temphi. Ninjani vele?

NDVUKUTEMPHI: Ucinisile?

MADZANDZA: Hawu? Yebo ngiyangena nje! Nalaba labeme esangweni bangafakaza.

NDVUKUTEMPHI: Cha akudzingeki loko. (*Ngemoya lophasi.*) Kadze sanigcina.

QEDIZIZWE: E---e! Kungaba kuhle mina ngicele indlela, Zinyane! Masithi kuzohamba kanjalo-ke Zinyane leSilwane. Masiyibone ngosuku loButimba leyo nyamazane. Ayixabene!

NDVUKUTEMPHI: Kulungile Zulu, asimise kanjalo. (*Aphume Qedizizwe.*) Tjela mine, ukhala ngani-ke lomuhla?

MADZANDZA: Kute lengikhala ngako. Ngitse ase ngitekubona nje ngive kutsi solomane uyakhiphita yini ngalomntfwana wakho ...

NDVUKUTEMPHI: Ngakutjela kutsi angati lutfo! Ufuna ngikhulume kangaki?

MADZANDZA: Uyati angiva kutsi lomntfwanami usikhubekiso ngani ngobe nemkhosi sewengcile awukabutfoli bukhosi lobe ubu ...

NDVUKUTEMPHI: (*Asondzele kuye kungatsi ufuna kumbeka sandla.*) Ye wena! Yekela tindzaba letingesito takho uyangiva?

MADZANDZA: Cha kumangala nje kutsi sewusikhubekiso ngani nyalo. Kumbe vele awusangitsandzi? Mhlawumbe bacinisile laba labatsi liso lakho selinamatsele kuKhetsiwe, iNdlovuka ...

NDVUKUTEMPHI: Khetsiwe wani? Leyo ntfo leyo nginje nje nje ngiyo! Nx!

MADZANDZA: Temphi, vele uyamphika lomntfwana?

NDVUKUTEMPHI: Uvile nje? Ngiphindze kangaki?



MADZANDZA: Ulahla litsambo lakho? Cha angikushiye-ke. Bengitsi umfula sewubohlile. (*Atsi nasekafulatsele nje agucuke ambuke atsi.*) Ubolibamba lingashoni. Siphundvu sibohlala sibona ngobe labosa ngebumnyama esangweni bangahle bose nemantjontjo akho uwabukile, tinyenti kabi tinkhomo letilindze kuhlatjwa.

NDVUKUTEMPHI: (*Etfukile.*) Tinkh ... kuhlatjw ... Utsini?

[Likhasi 45]

- 2.1 Emagama ekugcina aNdvukutemphi atsini ngemntfwana wakhe? Khetsa YINYE imphendvulo kuleti.
- A Usale ubhasobhe umntfwana wami.  
 B Nika babe umntfwana wami.  
 C Shiya umntfwana wami ekhreshi.  
 D Nika make umntfwana wami. (1)
- 2.2 Lenkhulumo letsi, 'ubolibamba lingashoni' ngabe isho kutsini? Khetsa YINYE imphendvulo kuleti.
- A Kubohlala kukuhambela kahle.  
 B Ubohlala uhamba emini.  
 C Ungabomtsemba umuntfu.  
 D Ungabohlala ukhubekile. (1)
- 2.3 Usho kutsini Madzandza nakatsi, 'Ulahla litsambo lakho'? Khetsa YINYE imphendvulo kuleti.
- A Ulahla kudla kwakho.  
 B Ulahla umntfwana wakho.  
 C Udla kudla ulahle ematsambo.  
 D Uphengula ngematsambo. (1)
- 2.4 Ngabe ucondzeni Qedizizwe nakatsi, 'Kungaba kuhle mine ngicele indlela'? Khetsa YINYE imphendvulo kuleti.
- A Kuncono kuliwe.  
 B Kuncono ngicinise inhloko.  
 C Kuncono ngilale.  
 D Kuncono ngihambe. (1)
- 2.5 Shano kutsi lomdlalo wenteka kuphi. (1)

## 2.6 Condzanisa inkhulumo lekuKHOLOMU A netimphendvulo letikuKHOLOMU B.

KHOLOMU A	KHOLOMU B
2.6.1 Sibekandzaba	A Inkhosi yeBatfwa.
2.6.2 Ludweshu	B Intfombi yaNdvukutemphi.
2.6.3 Madzandza	C Lijaha laZulu lelikhonte eveni leBatfwa.
2.6.4 IMbiba	D Kushayisana kwemicondvo.
2.6.5 Qedizizwe	E Indzawo lapho kwenteka khona indzaba.

(5 x 1) (5)

- 2.7 Ngabe lendzaba yenteka ngesikhatsi sanyalo nobe sakudzala? Sekela imphendvulo yakho. (2)
- 2.8 Ngekubona kwakho loku lokwentiwa nguNdvukutemphi kwekuphika umntfwana, kuyenteka yini emphakatsini lophila kuwo? Sekela imphendvulo yakho. (2)
- 2.9 Nika ligama lemlingisi lomkhulu nenkinga labukene nayo kulomdlalo. (2)
- 2.10 Ngabe letheekhsthi lengenhla ingadlaleka yini esiteji? Sekela ngemaphuzu LAMABILI. (2)
- 2.11 Ndvukutemphi uvetwe njengemlingisi lonesimilo lesinjani? Sekela imphendvulo yakho. (2)
- 2.12 Ngabe kuliphutsa yini nobe kuliciniso kutsi bukhosi beBatfwa batsatfwa nguTsembative? Sekela imphendvulo yakho. (2)
- 2.13 Shano ingcikitsi letfolakala kulomdlalo? Sekela imphendvulo yakho. (2)
- 2.14 Lukuphi luvutfondzaba kulomdlalo? (2)
- 2.15 Shano kutsi ludweshu lolukhona kulesicashunwa ngabe lwangaphandle nobe lwangekhatsi. Sekela imphendvulo yakho ngemaphuzu LAMABILI. (3)
- 2.16 Bhala sifundvo lesitfolakala kulomdlalo wesekele ngekubhekisa emdlalweni. (3)
- 2.17 Ngekubona kwakho ngabe kumfanele yini Ndvukutemphi kubusa live? Sekela imphendvulo yakho. (3)

**[35]****SAMBA SESIGABA B: 35**

**SIGABA C: TINDZABA LETIMFISHA****UMBUTO 3: LITSAMBO – EJ Mhlanga**

Phendvula YOMIBILI imibuto lebutwe ngetindzaba letimfisha.

3.1 Fundza lethekesthi lengentasi bese uphendvula imibuto letawulandzela.

**WANGENTA MAKHELWANE – Martha F Mkhonza**

LaZulu bekendze kaMlangeni eMkhwakhweni eMatsulu. Ukhuluma yedvwa akatenti. Bonisile longemahlango abo naMlangeni sewutefwele. Besekusele umnyaka munye nje vo aphotfule ticu takhe te-B.A enyuvesi yaseQwaqwa. Ngekweswelakala kwebhazari uyise wagcina avumile kumchuba etifundweni takhe, kantsi wacala washaya phasi ngendvuku. Phela yena bekakholelwa ekutseni intfombatana asikho sidzingo sekutsi ifundze igogodze ngobe kwayo kupheka, iwashe, ilime iphindze itale bantfwana lapho yendze khona. Noko kusebenta nebantfu eNgodwane kwayitsambisa ingcondvo yakhe wakubona kubaluleka kwemfundvo kulabasikati. Kungako wavuma kutsengisa tinkhomo kute kutfolakale imali yekuchuba Bonisile.

Bekacabanga angacedzi nje LaZulu bekangatenti, bekacabangela lemali yaMlangeni leseymuke nemfula. Washikashikeka ngemcabango LaZulu wagcina abone kutsi kuncono ayibute intfombi yakakhe ngobe phela yena besekayifundze ivaliwe. Pho bekaneliso kulolo hlangotsi, umuntfu lotetfwele bekambona sisasuka nje phasi. Wayibita intfombi yakakhe wayibuta.

'Bonisile wazimuka kangaka wacwatimula unani?' 'Anginalutfo make.'

'Yeyi wena Bonisile ngitsi mine unani mani khuluma?' 'Angi ... angi ... a ...'

'Yimihlola yini sewucale nini kuba nemangangamela wena?'

Kodvwa yeBonisile ufuna kubonani? Tjela mine wabani lomtfwalo lowetfwele wena?'

'Wa ... wa ... waMandla make.'

'Wakuphi yena loMandla?'

'WaseLikazi make kaSoko.'

'Tjela mine-ke sewumitsa nje sekwentenjani njengaloku emakhondomu agcwele lonkhe lelive?'

'Angati make, kube liphutsa ...' ' Ungahhemi wena, kantsi njengaloku kushunyayelwa kangaka ngekuya emacansini ungakavikeleki, wena utsi kuyadlalwa yini?'

[Likhasi 98]

3.1.1 Similo saMlangeni sifaniswa neselibhubesi. Loku kusho kutsi ...  
Khetsa YINYE imphendvulo kuleti.

- A Mlangeni sigebengu.
- B Mlangeni utsandza inyama.
- C Mlangeni unelulaka.
- D Mlangeni uhlala ehlatsini.

(1)

- 3.1.2 Shano indzawo lapho yenteka khona lendzatjana lengenhla. Khetsa YINYE imphendvulo kuleti.
- A ELekazi  
B EMbombela  
C Emkhwakhweni  
D Engodini (1)
- 3.1.3 Ngubani umlingisi lomkhulu kulendzatjana lengenhla? Sekela imphendvulo yakho ngeliphuzu LINYE. (2)
- 3.1.4 Condzanisa emagama lakuKHOLOMU A netimphendvulo letikuKHOLOMU B.
- | IKHOLOMU A             | IKHOLOMU B                |
|------------------------|---------------------------|
| (a) Indilinga          | A Inyanga lehushula tisu. |
| (b) Singani saBonisile | D LaZulu                  |
| (c) LaMalaza           | B Emkhwakhweni.           |
| (d) Likhaya laMlangeni | C Mandla.                 |
- (4 x 1) (4)
- 3.1.5 Itsini ingcikitsi yalendzatjana lengenhla? Sekela imphendvulo yakho. (2)
- 3.1.6 Kuliciniso nobe liphutsa kutsi Mandla bekatimisele kulobola Bonisile. Sekela ngeliphuzu LINYE. (2)
- 3.1.7 Indzaba lemfisha kumele ibe nebalingisi labambalwa. Ngabe linani lebalingisi balendzatjana lifanele yini? Sekela imphendvulo yakho. (2)
- 3.1.8 Lenzaba iphetseke kahle. Vuma nobe uphikise ngekwesekela ngemaphuzu LAMABILI. (2)
- 3.1.9 Sifundvo sini lesitfolakala kulendzatjana?. Bhala emaphuzu LAMABILI (2)

**[18]**

## 3.2 Fundza lethekesthi lengentasi bese uphendvula imibuto letawulandzela.

**TITIFIKETI – Jozi J Thwala**

Bakhuluma nje boNdzabatakhe naMusa bahleti esitubhini lesisendlini leyakhiwe ekhatsi emabaleni esikolo. Wasukuma Ndzabatakhe wangena endlini wayewunatsa emanti, wabuya ngekushesha watawucala lenye inkhulumo.

'Nibangaki ekhaya seninonkhe?'

'Silishumi. Bafana labasihlanu. Bafana labakhulu kunami basekolishi, bese kuba ngimi lengisebentako. Bonkhe laba labanye beta ngemuva kwami. Bafundza emabanga lehlukene aseSekhondari nasePhrayimari.'

'Nibanyenti impela. Tsine sibane nje kuphela, bafana bodwana. Lomkhulu useLesotho; lolandzela loyo useZimbabwe; lomunye ungesheya kuleNciba bese kuba ngimi-ke lengilapha eNingizimu Afrika,' kusho Ndzabatakhe.

'Kusho kutsi nifundzile nonkhe ekhaya? Batali bodwa nje basele leSwatini?'

Kubuta Musa akhombisa kumangala nekuhalalisa kuloku lokuhle lakuvako.

'Noko-ke bona akusibo labafundzile. Ngubabe lomncane Ndzabatakhe lengacanjwa ngaye lowabe afundzile. Lokubhulungu-ke kutsi sewashona.'

'Bayajabula batali benu ngekuba nebantfwana labafundzile. Loko kuyinhlanhla lenkhulu. Sibongo sakaMagongo nje sihle kulamave lapho kunebanakenu khona.' Musa wakhombisa kubabongela kulemphumelelo yabo kaMagongo. Watfola kutsi bonkhe bothishela bafundzisa etikolweni letiphakeme.'

Yini ndzaba ukhetse kuba lapha eNingizimu Afrika?'

'Ngayikhetsa lendzawo ngobe isondzelene nasekhaya. Batali bami seabkhulile, ngimi lesengibuke bona. Kuhamba kwetfu sonkhe siye khashane bekutasihlupha kakhulu.'

'Liciniso lelo batali kumele bananakekelwe kakhulu ngobe nabo bawenta wabo umsebenti wekunikhulisa. Kulahla batali kukwenta ungabi nenhlanhla,' kusho Musa.

[Likhasi 106]

3.2.1 Kungani bantfwana besikolo bacambe Ndzabatakhe ngekutsi nguTitifiketi?

Khetsa YINYE imphendvulo kuleti.

- A Ndzabatakhe ufundze wagogodza.
- B Ndzabatakhe utsengisa titifiketi.
- C Ndzabatakhe utsandza kukhuluma ngetitifiketi.
- D Ndzabatakhe wenta bafundzi baphase lula.

(1)

3.2.2 Uma ulandzela lendzatjana yonkhe, Ndzabatakhe utifole kuphi ticu takhe?

Khetsa YINYE imphendvulo kuleti.

- A Watifola enyuvesi yaseSwatini
- B Watifola ekolishi laseMgwenya.
- C Watifola kubabe wakhe lomncane.
- D Watifola enyuvesi yase-UNISA.

(1)

- 3.2.3 Condzanisa inkhulumo lekuKHOLOMU A naletimphendvulo letikuKHOLOMU B.

IKHOLOMU A	IKHOLOMU B
(a) Sibekandzaba	A Kuboshwa kwaNdzabatakhe.
(b) Umlingisi losicaba	B Akakengci ebangeni lesiphohlango.
(c) Luvutfondzaba	C EDundonald.
(d) Imfundvo yaDludlumela	D Sifiso Dvuba.
(e) Kusola titifiketi taNdzabatakhe	E Ndzabatakhe.

(5 x 1) (5)

- 3.2.4 Siphetho salendzatjana silindzelekile yini nasilandzela inkhulumo yaNdzabatakhe naMusa? Sekela imphendvulo yakho. (2)
- 3.2.5 Ngubani umlingisi lomkhulu? Sekela imphendvulo yakho. (2)
- 3.2.6 Itsini ingcikitsi yalendzatjana? Sekela ngeliphuzu. (2)
- 3.2.7 Sifundvo sini lesitfolakala kulendzatjana? Bhala emaphuzu abe LAMABILI. (2)
- 3.2.8 Ngabe sihloko lesitsi, 'Titifiketi' siyahambisana yini nalenzaba? Sekela ngeliphuzu LINYE. (2)

[17]

**SAMBA SESIGABA C: 35**

**SIGABA D: TINKONDLO****UMBUTO 4**

Phendvula TOTIMBILI tinkondlo lekubutwe ngato.

4.1 Fundza lenkondlo lelandzelako bese uphendvula imibuto letawulandzela.

**SESIFIKILE – TM Mongwe**

- 1 Konkhe kunesikhatsi sako.
- 2 Isho njalo incwadzi yeNkhosi,
- 3 Wonkhe umuntfu kumele atilungiselele,
- 4 Ngoba loluhambo aludzingi mphako.
- 5 Nakimi sikhatsi sesifikile,
- 6 Sekutsi ngibuyele lapho ngavela khona.
- 7 Kodwa tinini tona cha, angihambi nato,
- 8 Ngisho nelitsemba lami imbala.
- 9 Tsemba lami usale kahle utinte
- 10 Mine, sengiyahamba, sami sikhatsi, sesifikile,
- 11 Ungangilileli ngoba funa siphindze sibonane,
- 12 Munye kuphela lowatiko,
- 13 Ngoba sami sikhatsi sesifikile.
- 14 Sala ngekuthula tsemba, Gugu lami, ungasakhali.

[Likhasi 79]

- 4.1.1 Sonkondlo ubukeka akusiphi simo uma ubuka lomugca longentasi? 'Gugu lami, ungasakhali.' (1)
- 4.1.2 Usho bani sonkondlo nakatsi, 'Munye kuphela lowatiko'? Khetsa YINYE imphendvulo kuleti. (1)
- A Ngulamtsandzako.  
B NguMdali wakhe.  
C Nguthishela wakhe.  
D Ngunkhosikati wakhe.
- 4.1.3 Bhala bunkondlo lobutfolakala emgceni 5 newe-6. Nakimi sikhatsi sesifikile, Sekutsi ngibuyele lapho ngavela khona (1)
- 4.1.4 Shano kutsi lenkondlo lengenhla iluhlobo luni. Sekela imphendvulo yakho. (2)
- 4.1.5 Bhala luchumano lolusetjentiswe emigceni 1 newe-3, usho nekutsi luluhlobo luni. (2)
- 4.1.6 Shano kutsi lemigca lengentasi ihleleke njani. Munye kuphela lowatiko, Ngoba sami sikhatsi sesifikile (2)

- 4.1.7 Caphuna umugca losenkondlweni lochaza kutsi sonkondlo akafuni kukhalelwa. (2)
- 4.1.8 Ngabe ngumbono nobe liciniso yini kutsi bonkhe bantfu bayavalelisa uma sekufike sikhatsi sekutsi bahambe emhlabeni? Sekela imphendvulo yakho. (2)
- 4.1.9 Ngabe nguyiphi incwadzi yeNkhosi lekukhulunywa ngayo kulenkondlo lengenhla? Khetsa YINYE imphendvulo kuleti. (2)
- A Libhayibheli.  
B Sichazamagama.  
C Inoveli.  
D Incwadzi yamatisi.
- 4.1.10 Ngabe lesihloko lesitsi, 'Sesifikile' siyahambisana nalokushiwo yinkondlo? Sekela imphendvulo yakho. (3)

[18]

4.2 Fundza lenkondlo lengentasi bese uphendvula imibuto letawulandzela.

**NGIVA INGOMA – CD Masilela**

- 1 Ngiva livi litsi angihaye,  
2 Ngihaye ngigiye ngicephuke  
3 Ngeliphimbo lelulwimi lwakitsi.  
4 Ungangibuti kutsi njengoba  
5 Ungangiva nje angikwititi ngani.
- 6 Mine ngibuta kutsi kungani ungangiva?  
7 Iminyaka lengaka uhlala nami?  
8 Mine ngilufundze njani lulwimi lwakho?  
9 Yingoba ngihlakaniphe kakhulu kunawe?  
10 Yingoba ngihlupheke kakhulu kunawe?
- 11 Ngiyekele ngikhulume ngelulwimi lwabokhokho bami,  
12 Ngiyekele ngigambute ngelulwimi lengiphupha ngalo,  
13 Ngelulwimi lwelugcozi loluta kimi  
14 Kwemagagasi elwandle,  
15 Ngivuke ngitsi gelekece ebusuku  
16 Ngive labalele bangilalelisa endlebeni.  
17 Ngive ingoma levusa lusinga ingifundzekela.
- 18 Ngitsi ibuyile i-Afrika!  
19 Sukuma mntfwanemlungu ufundze lulwimi lwami,  
20 Lulwimi lwami nesisekelo lesingemasiko.  
21 Lungisa tintfo sikhatsi sisekhona  
22 Kute nabakubuta kutsi  
23 Kwa ... Kwente ... Njani ...?

[Likhasi 70-71]



- 4.2.1 Hlobo luni lwesinongo senkhulumo lesitfolakala emgceci we-14? Khetsa YINYE imphendvulo kuleti.  
A Sifaniso  
B Kumunfutisa  
C Inhlonipho  
D Kucatsanisa (1)
- 4.2.2 Bhala bunkondlo lobakhiwa ngulemisindvo lebhalwe ngekucindzetelwa emgceci longentasi. **Ngihaye ngigiye ngicephuke**  
A Sifanankhamisa  
B Sifanamsindvo  
C Sifanangwaca  
D Imvumelwanosicalo (1)
- 4.2.3 Nguluphi luhlobo lwemvumelwano loluvelwa ngulemisindvo lebhalwe ngekucindzetelwa emigceci lengentasi? **Ngiva livi litsi angihaye, Ngihaye ngigiye ngicephuke** Khetsa YINYE imphendvulo kuleti.  
A Luchumanosicalo  
B Sifanankhamisa  
C Sifanangwaca  
D Imvumelwanosicalo (1)
- 4.2.4 Bhala ligama lelichaza kutsi sonkondlo ukhuluma ngalabangasekho endzimeni ye-3. (2)
- 4.2.5 Khokha luchumano lolusetjentiswe emigceci lengentasi uphindze usho kutsi luluhlobo luni.  
Yingoba ngihlakaniphile kakhulu kunawe?  
Yingoba ngihlupheke kakhulu kunawe? (2)
- 4.2.6 Ngemaphuzu LAMATSATFU bhala lokushiwo yinkondlo. (3)
- 4.2.7 Ngabe sonkondlo abekusiphi simo ngalesikhatsi abhala lenkondlo? Sekela imphendvulo yakho. (2)
- 4.2.8 Shano sizatfu lesenta sonkondlo asebentise loluphawu (?) kusukela emgceci we-6 kuya kuwe-10 enkondlweni lengenhla. (2)
- 4.2.9 Umphakatsi utfola siphi sifundvo nawufundza lenkondlo lengenhla? Bhala emaphuzu LAMATSATFU. (3)

**[17]**

**SAMBA SESIGABA D: 35**  
**SAMBA SAKO: 70**